



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Zelenskyy-i khi nung rara
tembangtetsü: Trump

Badminton World C'ships:
Sen World No 1 den mezüing



VOL. XXII ISSUE NO. 305 (ADOK 305)

DIMAPUR

SANGTENNÜ (TUESDAY)

LUROI (AUGUST) 19, 2025

₹ 5.00

NSF-i longkak aittsü ayonger

Dimapur, Luroi/August 18 (TYO): NEET 2025 admission atema Nagaland State Quota kübok Nagaland lisopur masüba candidate shimba anema ajungben longkak aittsü jazüker, ta Naga Students' Federation (NSF) sangdong ka ajanga ashi.

Nagaland State Quota ya khenyongi Naga nunger lisopur temeja asoshi wazüka ayuba lir, koba constitution ajanga Scheduled Tribes kumzüka ayutsü asoshi renema amshir.

Iba ama metemsüba candidate nem Nagaland State Quota kübok admission agütsüba ajanga Naga nunger lisopur kaketshir temeden rakzüker asütsü, khi atema mapa inyakba tesem aser affiliations mashi lenmang nung amshia tatishitsü tamajung yutsür aser State Quota policy tanüla aser

nükjidong nung timtem agütsür, ta NSF ajanga ashi.

Anungji NSF indang federating units aser sub-ordinate bodies ajunga dang volunteers nisung ter-re NSF Oking, Naga Solidarity Park, Kohima tonga August 19, 2025 anepdang 11:00 tashinung yoktsü metetdaksür, ta sangdong nung shia lir.

Naga nunger lisopur temeden wazüka ayuba nunung Nagaland nung aliba nübur ajak lungjemer nokdaksü aser iba longkak aitba nung shilem agütsü ayongzüker.

Naga nunger lisopur asoshi temeden agüja aliba wazüka ayutsü asoshi onok masetshie nokdaka lir. Iba temeden mashi lenmang nung amshitsü merangba nung onoki sashi-sashia anema nokdaksü, ta NSF sangdong ajanga ashi.

Nagaland Cabinet züingsemtem Delhi-i aor, MHA ajurutsü akok

Kohima, Luroi/August 18 (TYO): Chief Minister Dr. Neiphiu Rio-i anr Nagaland Cabinet pur Mongulbarnü New Delhi-i aotsü, kong Ministry of Home Affairs (MHA) aser Union Home Minister Amit Shah nunger den senden amentsü akok.

Nagaland sorkar indang odongtar Minister KG Kenye-i parnok aini aotsü aliba indang Hombarnü jangjatsü. Taoba mapang osangbener senden nung jembidang, Frontier Naga Territorial Authority (FNTA) asoshi ken o jembishinüa aliba nung jangjateptsü asoshi State Cabinet Delhi-i aotsü ama shia liasü.

"Tesem kar nung jangjateptsü nüngdaker. Lenir nungi indang-indang angashitsü nüngdaker," ta Kenye-i iba mapang shia liasü.

Tan Cabinet mission ya MHA nungi FNTA ken o jembishinüba indang tejangja angazüktsü asoshi lir ta pai ashi.

July 23 nü Delhi nung MHA, Eastern Nagaland Peoples' Organisation (ENPO) aser state sorkar nungi teshimtet lenirtem

tsüngta senden mena aliba ya iba onük nung jembishinü tesüsa alitsü.

FNTA dak alia Cabinet-i tang anendaka aliba Naga political issue aser tawa melenshiba Free Movement Regime (FMR) onüktema jembitsü imlar. FMR tasenba yagi Indo-Myanmar arütsü asana kilometer 16 tasazük nung senzütsü mela aliba kilometer 10 kumtsü aser crossing points toku dang kumtsü. State sorkari Centre dang iba telemtetba reprangshitsü ajungshia liasü aser arütsü nung alirtem timtemba indanga ashi.

Taoba Independence Day nung jembidang CM Rio-i par sorkar asoshi Naga political issue bentetsü ya teinyaktsü tongtipangtiba lir ta shia liasü.

Delhi nungi Cabinet meyipa shilangba sülen Political Affairs Committee (PAC) senden ka amentsü imlar. September 2 nungi 14th Nagaland Legislative Assembly indang Session tenet buba amentsü lia parnok Delhi-i aor.

DPS Dimapur-i tiyazü osang proker aitsür

Dimapur, August 18(TYO): Yashi yakanü social media nung Delhi Public School Dimapur nung azüngertemi lanur ka dak mejungi azük ta prokba osangji kenyongi tai lir ta tanü DPS Dimapur sangdong ka nung metetdaksüogo.

Nisung dak azüker lanurtem rongnungji nisung ka danga DPS Dimapur nung azünger mali ta kasa sangdong nungsa DPS Dimapur, Principal-i metetdaksü.

Iba ama tiyazü osang agi school tenüngmenüksüba ya ozüingi melaba ama bushitsü ta parnokisa metetdaksüogo.

Iba ama mapang tamajung nung tsüraburtemi school nungitba asoshi pelar aser yirua alisang asoshia yakta taneptsü ngudakjang ta sarasademtsür ta DPS Dimapur Principal-isa metetdaksü.(School Sangdong tapak 7 nung English nung agüja angutsü.)

NSF-ia NE nungi illegal immigrantsü mindoktsü akhanger

Kohima, Luroi/August 18 (TYO): Northeast region nungi illegal immigrants tem aridoktsü khanga North East nung aliba kaketshir tem den külemi Hombarnü Naga Students' Federation (NSF)-ia 'sit-in strike' ayongzüka liasü.

"Evict all illegal immigrants from North East" omen nung ajemdaker iba sentog ya North East Students' Organisation (NESO) tawabangba kübok Naga Solidarity Park, Kohima nung ayongzüka liasü. NESO ya region nung kaketshir aser lanur tentet tematiba lir.

Kohima nung iba sentong nung kaketshir reju balala nungi kaketshirtem, NSF aser NESO nungi ketdangsürtem, All Nagaland College Students' Union (ANCSU) aser kaketshir lenirtem dena liasü.

Iba longkak aitba nung shilem ka ama NESO State Coordinator Ejanthung Ngullie aser NSF tir Medovi Rhi densema kaketshir lenirtemi State Chief Secretary, Sentianger Imchen, IAS ajanga

Nagaland Chief Minister Dr. Neiphiu Rio nem tezüluba nung takhangba ka agütsü, kong region nung illegal immigration tebilemtsü tali akumba indang shia lir.

Kohima nung iba sentong agidang NESO general secretary Mutsikhoyo Yhobu-i zünga ashiba memorandum nung illegal migration ya region nung loktiliba aser sobaliba tesendaktep, nütsüng yongsük aser yimtenren tashi ita alitsüba nung tebilemtsü tulutiba rongnung ka lir ta ashi.

NESO ajanga Tripura nung lisopur nütsüng yongsük ang tajemba akumba, Assam nung mapang talangka 'anti-foreigners' agitation' aliba ajanga Assam Accord of 1985 renemba aser Meghalaya nung tanen makai longkak aita aruba tatishitsü tem shia liasü.

"Tanü iba tebilemtsü tuluba ang kumogo aser Assam nung demographic structure kanga melenshiba angur aser iba tebilemtsü ya region nung tesem balalai prokshia aor," ta

memorandum nung ashi.

Aiben ola adokaka Government of India-i nüngdakba mera teti asoshi magitet ta parnokisa ashi.

Parnoki Centre aser states tem dang iba tebilemtsü tekeraba nung temulung agüja inyaktsü ajungshi aser North East nung aliba lisopur maitsü, sobaliba aser alitsüba lendongpang nung lir, ta tekumdangtsü ashi.

Kaketshir tentet ajanga tekeraba nung illegal migrants tem puteta aser meyipa yoktsü aser Indo-Bangladesh arütsü shibangtsü akhang. Parnoki modern surveillance amshia arütsü azüokba tashi itshitsü aser security peria yoktsü aser region telungzük nung migrants tem tesem balalai aoba nungi nokdangtsü asoshi state balala tsüngta tesendaktep alitsü nüngdak ta ashi.

Lisopur temeden, sobaliba, oshi-oben, yimtenren aser ali kibur temeden wazüka ayutsü asoshi tapet ozüng yanglua ayutsü ashi.

Tanü nungi Peren district mokdangtsü

Dimapur, Luroi/August 18 (TYO): Zeliangrong Youth Organisation Nagaland (ZYON), Zeliangrong Students' Union Nagaland (ZSUN), aser Zeliangrong Mipui Organisation (ZMO) ajanga August 19, 2025 anepdang 10:00 ako nungi tenzüka Peren district ajunga nung mapang telatet makai "aggressive agitation" noklem tanabuba tenzüksü.

April 7 nü Mhaikam aser Pimla village tsüngta tetsür ta tasü mang ngutetba dak sendakba nung Nagaland sorkar aser ozüng amshirtemi ochi obendang magütsütetba mechi iba telemtetba ya agi, ta parnokisa ashi.

Mapang shidak nung obendang magütsüba atema tejashi sayua longkak aiter aser iba mapang district administration nungu subordinate offices tem tashi sorkar office ajunga shibangtsütsü aser sorkar indang gari senzüba ajunga nokdangtsü. Kasa mapang National Highway-

129A aser interstate lenmang tem shibangtsü, ta parnokisa ashi.

District tesem ajunga nung iba longkak aitba ya CSOs temi meita reprangtsü aser sorkar, ozüng amshir aser sendaka aliba department temi forensic report nung terenlok aliba osang magütsü tashi aser ochi obendang magütsü tashi mokdangtsü, ta ashi.

Administrative gari tem menokdangtsü saka danga sorkar gari tem nokdaksü aser iba mapang apuba gari tem magütsütsü, ta ashi.

Tang longkak aitba nung telangzüba tajung mongura, onoki yimya balaka nung longkak aittsü aser iba mapang Commissioner of Police indang office dena shibangtsütsü, ta ZYON, ZSUN aser ZMO ajanga ashi.

Onoki yimjung nung longkak aittsü, saka tashiyim amshiba lira onoki anasü agi telangzüba agütsütsü, aser iba nisung

tepsetba nung tai tonglokja alir tang bail nung alir dak langka kar atalokra onoki khuret mabentsü, ta ashi.

Dimapur nung August 14 nü osangbener senden ka nung jembidang Zeliang nunger lokti tentet temi state sorkar mesüra ozüng amshirtem den senden ojang dang amentsü aser August 19 tashinung mera agitsüla, ta shia liasü.

Iba mokdang nung Health department, schools aser colleges, paramilitary forces, fire and emergency services, Power department field-duty staff tem senzütsü melatsü saka office bo shibangtsü ta ashi.

Kasa mapang parnokisa nüburtem aser talisa tetsürtem dang sobaliba sübotsü sübor iba longkak aitba nung shilem agütsü ayongzüka liasü.

Ibai Zeliangrong kin atema kisüng masü saka tetsürtem kumzüka ayutsü asoshi lir, ta parnokisa ashi.

CS-i Job RC züingsem shimba jangjatsür

Dimapur, Luroi/August 18 (TYO): Job Reservation Commission tasen ka tentetba nung züingsemtem shimba nung 5 Tribes Committee on Review of Reservation Policy (CoRRP) ajanga tai apuba sülen Nagaland Chief Secretary, Sentianger Imchen, IAS-i iba mangatettep jangjashija sangdong ka agütsüba nung, civil society organisations tem dang organisations indang mendenpur masü saka pei kin nungi tejangja nübu tetemsü shimtsü ashiba lir, ta ashi.

Sorkar mapa nung Reservation Policy asadanga report ka bener arutsü asoshi State sorkari Commission ka tentettsü August 6, 2025 nü mela. Iba Commission ya Nagaland cadre retired IAS officer ka tekolok asür sorkar ketdangsür asem, Eastern Nagaland People's Organisation, Central Nagaland Tribes Council, aser Tenyimi Union Nagaland nungi nominee ka-ka alitsü.

"CSOs temi iba committee züingsem atema CSO mendenpur masü saka pei kin nungi tejangja

nübu tetemsü shimtsüba ashirba lir ta jangjatsür," ta sangdong ajanga ashi.

Reservation policy reprangshiba mapang kin shia tangatetba lemsatepa asadangtsü asoshi iba telemtetba ya agi, ta Nagaland Chief Secretary-i rateta ashi. Iba ken o ya sorkar kisüingi telemtetba agila masü, ta pai ashi.

Report tajungba nung renemtsü mechi 5 Tribe CoRRP dang Commission tentetba nung par tangatetba melenshitsü ayongzüker, ta Chief Secretary ajangasa ashi.

Regional Process Lab nung Nagaland team-i shilem agi



Guwahati nung AADI KARMAYOGI ABHIYAN atema Regional Process Lab agiba mapang Nagaland team aser Change leader Coach den tangokba noksa nung angur.

Dimapur, Luroi/August 18 (TYO): AADI KARMAYOGI ABHIYAN atema anogo tenet Regional Process Lab ka Guwahati nung August 11 nungi 17 tashi Sikkim, Assam, Mizoram aser Nagaland nungi ketdangsürtem atema kaogo.

Iba lab nung Tribal Affairs Department, Social Welfare Department, Health & Family Welfare Department, Rural Development Department, Education Department, PHE aser Forest Department amala line department balala nungi ketdangsürtem shilem agia liasü.

Sentong ya Minister, Tribal Affairs Department, Government of Assam, Dr. Ranoj Pegu-i, L. Sweety Changsen, ACS, Department of Tribal Affairs (plain) Government of Assam; Binita Pegu, Secretary Tribal Affairs Department (Hills); Debolina Thakur, Joint Secretary, Ministry of Tribal Affairs, Government of India nunger

matsüngdang tenzüja liasü.

Regional Process Lab ya sentong nung shilem agirtem longjemer angazükdaktsüsü atema apitetba lir. Iba sentong ya State Master Trainers (SMTs) tem nem tenügdakba tasa aser shisatsü agütsüsü nükjiding nung ayongzüka agiogo, aser ajanga parnok kübok aliba tesemtem nung temelenshi bener arutsüttsü.

Lab nung sensaksem sentong, workshop, lokti sensaksem, lokti activity aser presentation tem densema liasü. Sentong nung shilem agirtemi parnok tajangshiba aser pei state nung inyakyimtem lemsatapa liasü.

AADI KARMAYOGI ABHIYAN ya Ministry of Tribal Affairs, Government of India indang sentong ka lir, koba linük nung tribal tem aliba yimtsüing lakh ka dak tema nung governance aser terenlok bener arutsü atema grassroots nung temelenshi bener arutsüttsü

asoshi lenir million 2 anitettsü nükjiding nung amenoka lir.

Iba setong ya Bharat Rural Livelihoods Foundation (BRLF) den longjemer benoka inyakdar.

Iba sentong nükjiding atongtsü atema Regional Process Lab ya tongtibang jenjang ka agiba liasü aser iba sentong nung shilem agirtemi STATE MASTER TRAINERS ama pei state nung temelenshi bener arutsüttsü asoshi tongtibang shilem agitsü imlar.

Item STATE MASTER TRAINERS teku ya, AADI KARMAYOGI ABHIYAN takok ngua benoktsü atema District Master Trainers (DMTs) aser Block Master Trainers (BMTs) anitettsü asoshi tangazükba aser shisatsü shitak agütsüsü atema sayutetogo.

Iba sentong ya Coach, Binita Pegu, Secretary Tribal Affairs Department (Hills) Government of Assam-i shilem agirtem nem tetushi agütsür tembanga liasü.

Dimapur DPDB senden thinener

Dimapur, Luroi/August 18 (TYO): August ita atema Dimapur District Planning & Development Board (DPDB) senden osang tejanga magütsü tashi mapang telatet ka makai thinenba metetdaktsüogo.

Deputy Commissioner, aser DPDB, Dimapur Vice Chairman,

Dr. Tinojongshi Chang, NCS-i sangdong ka ajanga züngsem ajak dang senden thinenba osang ya temulungdang ayutsü metetdaktsüogo.

Senden dak sendakba nung mapang aser anogo mapangtong nung sangdong tsü, ta DC-isa metetdaktsü.

Dimapur DC-i senden ayonger

Dimapur, Luroi/August 18 (TYO): Dimapur Deputy Commissioner, Dr. Tinojongshi Chang-i Bharat Scouts and Guides, Dimapur Silver Jubilee Committee senden ka August 20 nü DC's Conference Hall,

Dimapur Deputy Commissioner-isa, committee züngsem ajak dang iba senden nung tamakok maludaktsüi arua shilem agitsü mepeshia metetdaktsüogo.

Assam Rifles-i sentong balala ayongzüka agi



Dimapur, Luroi/August 18 (TYO): Rifleman asür Pasan Tamang-i, 1957 küm August 18 nü counter-insurgency operations ka agiba mapang pa taküm bendanga agütsüba atema tetushi agüja Assam Rifles-i Jalukie, Peren nung naro toktsüba sentong ka ayongzüka agiogo.

1957 küm August ita Nagaland nung tensa aziüktsü atema 9 Assam Rifles company ana yoka liasü. Meita aoba sentong ka benoka inyakba mapang Rifleman Pasan Tamang ya telungpurtemi amak. Pai kanga tasü ita meranga rara-a linük asoshi pa taküm bendanga agüja liasü.

Iba sentong ajanga pa tasü aitba aser pai taküm dena bendanga agüja linük tenzüka atema tetushi agütsüogo.

Kasa mapang nung Director General Assam Rifles, Lt Gen Vikas Lakhera, AVSM, SM-i August 18 nü Headquarters Inspector General Assam Rifles (North), Kohima semdanga liasü.

Pai iba tesem semdangba mapang, iba tesem nung sepaitem operation balala asoshi renema aliba, security dak sendakba nung tensa aser sepaitem tajangzük atema inyakbatem indang metetdakja liasü.

DG-i, yimjung aser terenlok atema local civil administration aser security forces den ka küma longjemer inyaktsü koda tongtibang iba indang lemsatap. Paisha, sentong balala ajanga local tem den sendakteptsü asoshi IGAR (North), Kohima-i sentong tapu balala ayongzüka

agiba atema tenüngsang agütsü. Maneni Director General Assam Rifles, Lt Gen Vikas Lakhera, AVSM, SM-i Chieswema aser Ghaspani nung August 17 aser 18 nü National Integration and Educational Development Organisation (NIEDO) centre tem semdangogo.

Kaketshirtem den sensaksema kaketshisatsü bushiba nung temaba jenjang atongtsü aser competitive tatidangtem atema ajungmesotsü aser parnok libaliro asadangsü nükjiding nung pai item tesemtem semdanga liasü.

Chieswema nung DG Assam Rifles-i kaketshir 33 aser staff tem den sensak asem. Gaspani nunga pai kaketshir aser staff tem den ajuruteper aser parnoki bendanga agüja inyakba atema tenüngsang agütsüba den taküm yimayimpong aziüka temulungtetba tulu nung temaba jenjang atongtsü atema inyaktsü ajungshia liasü.

Paisha, iba centre ana nung facility balala agütsüba indang asadanga liasü. Maneni patriotism, linük tenzüksü aser linük tarutsü milen bener ama lanurtem shilem koda tongtibang iba indang lemsatapa liasü.

Maneni pai lenla ajak nung renloktsü koda tongtibang iba indang jembi aser kaketshirtem dang kaketshisatsü bushiba kija masü saisabong, sobaliba inyakyim, kentenmenü aser tanga extra-curricular inyakyimtem nunga temulung agütsüsü ajungshia liasü.

Life & family pension verification Sept ita agitsü

Dimapur, Luroi/August 18 (TYO): Senior Treasury Officer, Kohima South Treasury Office sangdong ka ajanga, Kohima south Treasury nungi life aser family pension agizüka alirtem dang 2025-2026 atema Verification September 10 nü nungi tenzüka Treasury Office, Kohima South Treasury nung office mapang agitsü ta metetdaktsüogo.

Pensioners tem ajak PPO book, yanglushir aliba NPA ID card aser life/family pension verification certificate (issued

vide Govt's Approval No. FIN/TA/PEN/3-1/2023, dated 3rd August 2023) bener atakzükja aliba anogo office-i arutsü tetuyuba agütsüogo. Verify masüba pensioner tem nem pension agütsüba anentsü ta kasa sangdong ajanga metetdaktsü.

Family Pension (Kohima South Treasury) physical verification atema anogo telemsa:

Date	File No
10-09-2025	01-450
11-09-2025	451-750
12-09-2025	751-1000

15-09-2025 1001-1150

16-09-2025 1151-1300

17-09-2025 1301-1410

18-09-2025 1411-1520

19-09-2025 1521-1650

Life Pension (Kohima South Treasury) physical verification atema anogo telemsa:

Date	File No
10-09-2025	01-600
11-09-2025	601-1100
12-09-2025	1101-1600
15-09-2025	1601-1850
16-09-2025	1851-2100
17-09-2025	2101-2300
18-09-2025	2301-2500
19-09-2025	2501-2726



Christian Higher Secondary School, Dimapur-i, school Educational Tour Team August 10 nü Parliament House semdanga tang agia aliba parliament session repringdangtsü asoshi Honourable Lok Sabha MP Shri Supongmeren Jamir aser pa indang PA Shri Pravesh Kumar nati teyari tulu agütsüba atema CHSS-i kanga pelaba lemsatapogo.

CEC-i SIR dak sendakba tasüngdangbatem melangzü: Opposition



August 18, 2025 nü New Delhi nung Opposition party balala nungi lenirtemi osangbenertem den jembidang tangokba noksa nung angur.

New Delhi, Luroi/August 18 (Agencies): Hombarnü Opposition party temi, Chief Election Commissioner (CEC), Gyanesh Kumar-i BJP otongdar ka amai inyaker, kechiyong pai electoral roll indang Special Intensive Revision (SIR) dak sendakba nung tasüngdangbatem atema telangzüba magütsü, ta metetdaksü.

New Delhi nung Congress, TMC, SP, DMK aser RJD densema opposition party 8-i osangbenertem senden ka ayongzüka akadang parnoki CEC sashia aitsü.

"Linük temzüng nung sensotem nem agütsüba temedentem rongnung tongtibangtibaji vote agütsütsü temeden ya lir. Democracy ji iba nungji metaloka lir. Election Commission ya ibaji kümzüksü atema lir. Ajisüaka yimtenren party temi asüngdangba tongtibang telangzüba aika

atema CEC-i telangzüba magütsü aser parnoki pei teinyaksü khuret paidoker," ta Congress lenir Gaurav Gogoi-i metetdaksü.

Gogoi-i, "Tasüngdangbatem langzütsü melen pai opposition dang aitsü. Election agitsü ita asem shi dang lia yimtenren party tem den melemtepi kechiba SIR benokar parnoki ashitsüla. Kechiba parnoki kanga aritepa SIR benok?," ta asüngdang.

Samajwadi party lenir, Ramgopal Yadav-i, "EC-i Gandhi dang pai jembiba o atema affidavit nung sign süang ta ashi. Ajisüaka 2022 küm voters list nungi tenüng 18,000 agienba atema SP-i affidavits nung tashishiba agüba atemabo EC-i kecha meinyak. 2022 küm UP election nung Akhilesh Yadav-i, SP pusemertem tenüng voter list nungi agienogo ta shia onoki affidavit agütsü, saka kecha

meinyak," ta metetdaksü.

Trinamool Congress lenir, Mahua Moitra-i, taoba election mapang nung voter list meshidak süra tang Lok Sabha ya anenadoktsüla, ta ashi.

Rashtriya Janata Dal lenir Manoj Jha-i, "Yashi onoki CEC bushia liasü saka BJP otongdar tasen ka dang angu," ta ashi.

Shiv Sena (UBT) nungi Arvind Sawant-ia, CEC-i BJP otongdar ama inyaker, ta ashi.

Hombarnü Tamil Nadu chief minister aser DMK Tir, MK Stalin-ia X ajanga, "Amongnü Chief Election Commissioner Gyanesh Kumar-i ayongzüka osangbenertem senden nung telangzüba agütsüba dang nungibo tasüngdangba ang teimba liasü," ta metetdaksü.

Bihar nung SIR exercise aija paia, "Kibok shiai oa survey agi süra kechiba vote agütsütsü temsüa alir voters aika tenüng züngdok?" ta asungdang.

Captain Shubhanshu Shukla-i PM Modi ajuru



New Delhi, August 18, 2025: Hombarnü New Delhi nung Group Captain aser Indian Air Force test pilot, Shubhanshu Shukla-i Ato kilonser, Narendra Modi ajurudang tangokba noksa nung angur.

New Delhi, August 18 (Agencies): Hombarnü New Delhi nung Group Captain aser Indian Air Force test pilot, Shubhanshu Shukla-i Ato kilonser, Narendra Modi ajuru.

Shukla-i Ato kilonser nem pai Ax-4 mission mapang International Space Station-i bener atuba India nunger wako sempet agütsü.

Shukla-isa pai ISS nung ajangshibatem aser tayongzüka balala Ato kilonser den lemsatop.

ISS nung parnoki scientific experiment aika agia liasü, item rongnung meimchir physiology nungi tenzüka space agriculture atema technologies densema

liasü; item tangazükbaji ajanga India nunger 'Gaganyaan human spaceflight' nung yaritsü.

Ato kilonser Modi-i Shukla dang nungi sempetji pelaa agizükba den külemi Shukla-i takok anguba aser pa ajanga lanurtem aika ajungmesoba atema pa nem tenüngsang agütsü.

Hombarnü Parliament nunga züngsemtemi Group Captain Shubhanshu Shukla nem tetushi agütsüogo. Union Minister of State for Science & Technology, Jitendra Singh leniba nung MP temi Shukla nem tenüngsang agütsü.

Shukla nem tetushi agütsüba nungji Opposition-ibo shilem magi, ajisüaka Congress MP

Shashi Tharoor-ibo India nunger fighter pilot, Shukla nem tenüngsang agütsü.

Tharoor-i X ajanga, "Temeja o lemtepa nungji Opposition-i shilem magir, anungji tawa Commander Shubhanshu Shukla International Space Station (ISS)-i atuba mission atema India nunger ajak nüma atangba ni lemsateper," ta metetdaksü.

Tharoor-isa, Shukla-i mezüng iba mission nung shilem agiba ya India nunger 'human spaceflight' nükjidong aliba atema alizüng ka tongtetba lir; iba ya India nunger Gaganyaan mission atema mera agiba lir, ta metetdaksü.

Linük tatong Tir election atema BJP-i CP Radhakrishnan shim

New Delhi, August 18 (Agencies): Linük tatong Tir election nung nung National Democratic Alliance (NDA) candidate ji Maharashtra Angh, CP Radhakrishnan asütsü, ta BJP-i sangdong.

September 9 nü tatong Tir election agitsü lia BJP national Tir aser Union Minister, JP Nadda-i, "Onoki opposition dena jembitsü. Linük tatong Tir atema tetokteper melii shimtsü atema onoki opposition den jembitsü," ta metetdaksü.

Tatong Tir ya Lok Sabha aser Rajya Sabha naprongla nung züngsemtemi shimmer. Tang House anaprongla nung BJP-i aniba NDA züngsemtem teimba lir.

Parliament House ana nung tang züngsem 786 lir aser menden tazüng trok lir. Lok Sabha menden ka Basirhat, West Bengal nungi lir aser Rajya Sabha menden pongu

(Jammu and Kashmir nung pezü aser Punjab nung ka) tazüng lir.

Iba election nung takok angutsü atema candidate kati tajemba agi vote 394 nüngdaker. Tang Lok Sabha nung NDA nungi MP 293 lir aser Rajya Sabha nunga NDA nungi MP 129 lir. Anungji tatong Tir election nung NDA candidate-i melamela takok angutsü.

Arrshi küm 74, Jagdeep Dhankhar-i taküm July 21 nü ajungbena tatong Tir menden nungi anena liasü. Pa temang mejungi dang aliba kuli nung ajemdaker pai menden nungi anenba shidi Tir, Droupadi Murmu nem agüja liasü.

Tatong Tir election ji September 9 nü Parliament House nung anepdang 10:00 ako nungi nikongdang 5:00 ako tashi agitsü aser kasa anogo nungjisa vote zünga election osang sangdongtsü.

Jaishankar aser China Foreign Minister Wang Yi na senden amen



August 18, 2025 nü New Delhi nung External affairs minister, S Jaishankar aser China foreign minister Wang Yi na senden amentsü lia tangokba noksa nung angur.

New Delhi, August 18 (Agencies): Hombarnü New Delhi nung External affairs minister S Jaishankar-i China foreign minister Wang Yi ajurua senden menogo.

Iba senden nung jembidang Jaishankar-i, India aser China na tsüngda tangatetba balalaji mangatettep ken o mekümdaktsütsüla, ta ashi.

Dr. Jaishankar-i, "Kiralongra tapu ajak anema raraba ya tongtibang onük ka lir. Iba dak sendakba nung tebilemba lemsateptsü ni yongyar. Iba senden mapang nung India aser China na tsüngda tashitait, amalitep aser tesendaktep yangertsü atema jembitsü imlar, koba ajanga asen linük anaprong tebilemtsü onüktem bentettsü," ta ashi.

Jaishankar-isa, Mongolbarnü Wang Yi aser India special representative, national security adviser Ajit Doval nati arrtsü dak sendakba ken otem jembitsü, ta metetdaksü.

Jaishankar-i, alima nung linük

tulutiba ana (nütsüng sasep nung) tsüngda International onüktem nung o lemteptsüji tim dang, ta metetdaksü.

Hombar nungi tenzüka Wang Yi-i anogo ananü atema India semdanger. Mongolbarnü NSA, Ajit Doval tena tsüngda 24buba Special Representatives (SRs) senden mena arrtsü mangatettep ken otem atema o lemteptsü.

Wang-i, China-i arrtsülen yimjung aser tesünep alitsü atema inyakba den külemi India nunger temeshi aini Mount Gang Renpoche aser Lake Mapam Yun Tso-i aoba melaogo, ta metetdaksü.

Yaküm December ita nung Ajit Doval-i China semdanga 23buba Special Representatives (SRs) senden nung dena liasü.

August 31 nungi September 1 tashi China nung Shanghai Cooperation Organisation (SCO) summit nung adentsü atema Ato kilonser Modi-i China semdangtsü lia tang Wang-i India semdanger.



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 19, 2025

Nagaland government koma aotsü?

Nagaland nung MLA 60 prongla government nung lir, anungji tatar senden nung opposition tejang kata mali, ajak 'ruling' telok nung dang lir. Iba jagi Nagaland government nung tai apur mali ajak tajungshi aser tepela o jembirtem dang lir. Ajisüaka, government asoshi tang tebilemtsü kaji, Nagaland nung govt mapa kin kar nem balaka shiteta yutsüba "Reservation" onük nung Nagaland nung Naga nung kin pungo telungjemi iba tebilemtsü onük ya government-i meyipa mereprangshi tashi government-i nübortem asoshi ayongba sentongtem kecha nunga madentsü ta metetdaksüba, tajung tangatetep kati maru tashi, Nagaland government asoshi tebilemtsü tuluka asütsüsa kümadokogo. Iba 'Reservation' sentong ya khen meyipa reprangshitsüla ta akangba kin pungoji Ao, Angami, Lotha, Sumi aser Rengma nungertem lir. Ibaji kodang bilemdangdir, item kin pungoji maden Nagaland nung nübortem asoshi government-i ayongba sentong topur majungtsü, anungji mayongzükanng tajungba asütsü. Ibaji dang masü saka tang Nagaland asoshi tebilemdangtsü onük tongtibang kaji, Nagaland anüdoklen alir kintem ajak lungjemer yimten jenjang tasen ka alangtettsü asoshi India government den ken o benoka jembia aoba yaa asütsü. Aji oda, Nagaland anülulen alirtemi "Job Reservation" sentong ya meyipa mereprang tashi state government-i ayongzüka sentong kecha nunga shilem magitsü ta lemteta akaba nung masetshii nokdaker aser ano külen Nagaland anüdoklen alirtem yimten jenjang tasen ka akümtsü ariteper ta asüba tensa tia ka nung, Nagaland government nung alir yimsüsürtem kisüing yutsür nübortembo balakaleni aoer amai kümadokogo. Atangji, Nagaland nung alir anüdoklen aser anülulen alirtemi tang adokba ola ya menurang adoker, kechiyong Nagaland government yabo tangar state government memesük, akhidang tatar senden nung lemtetbatema meyipa repranga meinyaker aser tarutsü asoshi bilema maparen balala nung putu tensa den apet ozüing aser inyakyimtema lateta meinyaker. Iba jagi, tanü tashi asenok Education, Health, Power, Industry, Agriculture, Horticulture aser Natural Resources amshiba aser anepaluba nung 'state policy' junga maka tapi agi tanüa tanü peri bushia taküm aliba purtem lir. Ashi, asenoka tangar state nung amato ozüing yanglurtemi nübortem nungdak reprangteta tensa den apet ozüing shitak yangluli aser aji ozüing agi mapa küma inyaksüba purtemi mapa küma inyaki ta inyaka aru asübo, tang yabo Nagaland nung 'backward' aser 'forward' otsü kecha mejembila aser anüdoklen aser anülulen alirtemi Nagaland government mapa nung temulung masüba melila. Aji oda, akhi mapang latetba ozüingtem putu piyong kena meyipa mereprangdangi arubaji asenoki tanü nübortem tia aser nungdak memetet ser asena asen lima balaka nung aliba ajanga lir. Aji oda, nibo jangratema alir, ozü chirnurtem government mapai aitsü shisabolutsüsa masü, parnok asoshibo mapa peria lir. Ano, shilumanem mapanga yakta mozü ki tajungtiba tongtettsü, light junga maruyonga generator aser solar power ajanga nungdak inyaktettsü ta dang Nagaland nung tongtibang nisungtemi bilemra, nübortem tang tashi 'backward' tia nung alir asü aser malir memetettsü ! Tanübo shitakba Nagaland tia asadanga, 'backward' purtem 'forward'-i aotsü melena 'forward' purtemang 'backward' leni aoba tensa tia ka nung nübortem timtem aser takoksa marem ola adokba angashir. Mapang talangka Nagaland ya ozüing makaba lima ka amai aruogo, anungji tajung kümnüyonga koma akümtsüar memetet ser nübortem nem lenisüba tajung ka magütsütet aser government mapa nung inyakerem nema pei teinyaktsü mapa metuyutet, shibai sen teimba 'adjust' süa agitetter ta asüba 'policy' nung dang Nagaland government agi government memesük tazüokba kecha maka, mashi mashi lia aruogo. Atangji, nübortmi government sentong nung madentsü ta lemtetbaji, kiburi peisasa pei lui maotsü lemtet amato lir, ajisüaka koda sütsü, kibur jakla ngur kilirtemi tashi manger. Joko, mapang tonger tajungba melenshitsu tenzüker südakjangma ta dang imlaa atar.

OLEMSABANG

Arogo kaji terenlok mapa nung ainba jagi teperi asü ?

~ L. Kika Pongener.

(Yashi adok nungi...)

Kodang shitakba arogo ka ainba indangji shisadangdir....Tenyaba mapa (Mission) nung wadang koba-teka awa-a oa inyaker (?) Tanela anir aruba mapa (Soul wining) nung wadang koba-teka awaa oa inyaker (?) Nutsüngsuba mapa (Discipleship) koba-teka awa-a oa inyaker (?) Tsüngrem o sayuba aser bushiba (Bible Study) nung mapang teimba endoker asü (?) Arogopurtem tanela nung asüngsashiba (Revival) aser tenzükertem kümkümshiba (Oreintation) mapang shia agir asü (?) Arogo-ji laishiba tesayuba/tetuyuba (Biblical) nung amendaker anir asü (?) Mesura nisunger tashitemetet aser shisatsü agi anir (?) Pulpit nung nokdaker sayutsüngiba agi peridaktsür asü (?) Mesura kipok shiai tsüngdong yia Tsüngrem o sayur (?) Toklang tenzükertemi arogo nung nutsüng tulu-tila ajunga tenung-teta meteta ali asü mali (?) Mesura kibong tajung, takar, tulur, sentsü-keter kibongtem dang metetet asü (?) Sensaker, tilar, meshi-mejunger kibongtembo mongui senzuka toktsür asü (?) Tenzükertem arogo rongsen ketdangsuba nung dang rangloker, sen nung teka amuoka amshitsü dang jangrateper asü (?) Toklang tenzükertem office nung Air Condition, Fan, Heater nung ayung-ayunga mener mapang endoker asü (?) Kibongtem dangi kipoksem aotsübo Evangelistic Committee aser Sarasadem telok lir-ji ta sadok-sadoka alir asü (?) Toklang tenzüker mapaji Pulpit nung sayutsüngitsüba danga ta züba-züba-a tenzüker asü ...???

Aji oda, shitakba arogo ka ainba ta ajatsüba....Tsüngrem o nung tera ayangba, Tsüngrem o nung amendaker arogo inyakyim aser sentong ajak aniba aser inyakba, Tsüngrem o aroka bushiba aser sayuba, arogo nung Yisu Khrista kibur/tekolak sudaktsüba, laishiba teyungtsü sudaktsüba, tenyaba mapa aser tanela anir aruba mapa awa-a oa wadang tuluba inyakba, nutsüngsuba mapa nung temulong tali agütsüba, arogo rongsen ochishia ketdang sua amshiba, arogopur nutsüng ajak tamang lirumedema ainba, toklang tenzükertem ajak Pastor lenisüba küpok ka küma longjemer, kati ka akümtsüba tenzüka. Arogo nung tela-tenuk Ministry, Committee, Board ajaki pei pei teinyaktsü shilem takok ngua inyakba....Pastor aser toklang tenzükertemi tensa den tapet Tsüngrem o aser tanela chiyungtsü agi peria mesuba....Arogopur kibong ajak tekülem sentepi jangra-a aruba. Toklang tenzükertemi arogopur kibongtem tanela nungdak angateta yariba....Arogopur rongnung telemsa meli-i tamang ka, tanela ka aser telongjem ka nung lirumedema ainba....Iba dangji dang shitakba arogo ka ainba ta ajatsü akok.

Arogo ka tashi-ita lenla ajak nung lirumedema aintsü atema toklang tenzükertem ka küma longjemtsüla, kechiyong toklang tenzükertem melongjemra arogopur rongnung telemsa adoktsü ana nung lir. Arogo nung Yisu Khrista tekolak sudaktsütsüla, arogo inyakyim aser sentong ajak laishiba tesayuba nung amendaker anitsüla. Tenzükertem rongsen penbuba tenzüker masütsüla aser arogo rongsen ochishia ketdang asütsüla. Arogoji tanela mapa nung sutep-sutepa aintsü asoshi toklang tenzükertemi anir tela-tenuk balala nung tenzüker ajak longjemer, pei pei shilem takok ngua tamakok maludaktsüi inyaksüla. Arogo taintsü tim maintsüsa, mesura arogo nung petsaperong, mepetmesu, telemsa adoktsüsa toklang tenzüker, tenzüker, tenzükla shibai sentong atongdir, mesura tongti shilem agidir, pa/la-bo ayatai asütsü. Khristar arogo ka asen ajanga petsaperonga timtemdaktsüra Tsüngrem tsüngdang khuret tulu asütsü. Arogo ka ainbaji terenlok mapa nung ainbaji masü, saka tenyaba mapa, nutsüngsuba aser tanela anir aruba nung sutep-sutepa ainba dangang shitakba arogo ainba ta ajatsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arab nunger ka World Evangelical Alliance nung Secy. General shim



Botrus Mansour

August 18, 2025: Nazareth nungi Arab nunger Advocate Botrus Mansour, World Evangelical Alliance (WEA) nung Secretary General shimogo; Arab nungertem rongnungi mezüngbuba WEA nung tekolak menden angusangji pa asütsü.

World Evangelical Alliance-i Secretary General aser Chief Executive Officer menden atema Mansour shim. WEA nung linük 148 lir aser Evangelical Khristan züngsem million 600 dak tema lir.

October 27 nungi October 31 tashi South Korea yimtiba, Seoul nung WEA General Assembly aliba mapang nung Mansour-i office mapa agizüksü.

Taküm WEA General Assembly omenji "The Gospel for Everyone by 2033," lir. Tesüsabuba WEA sendenji 2019 küm Indonesia nung ayongzüka agi.

WEA Secretary General shimtsü atema ita trok tashi agia liasü. Iba menden atema nisung 25-i tenüng agütsü aser WEA International Council-i vote agütsütepa nisung asem shim, aser tesüsa Mansour shimogo.

2023 küm nungi WEA nung permanent Secretary General maliasü. 2023 küm March 31 nü taoba mapang Secretary General Thomas Schirrmacher-i pa temang mejungi dang aliba kuli nung ajemdaker iba menden nungi anisüngzüka liasü. Iba sülen April ita nungi Council Chair Dr. Goodwill Shana-i interim Secretary General inyaka aruogo.

Shana-i, "Iba menden atema shimba inyakyim ajak kanga nendaka, teladak süa aser sarasadema bushia aruogo. Mansour-i kilir-lenir tangatetba nung evangelical movement lenitsü atema sarasademtsür," ta metetdaksü.

Mansour tenüng mezüngbuba 'Botrus' ya Arabic oshi nung Peter lir.

Manosur-i, iba menden atema pa shimba asoshi pa

ajemalushir aser WEA mangdang tejakeni bener aotsü atema inyaksü, ta metetdaksü. "WEA International Council-i ni shimba aser kü dak tamang katetba atema ni ajemalushir. Iba khuret ta tulu, ta ni angateta dang lir," ta pai metetdaksü.

"Tsüngrem taochi ajanga ni tangartem den senteper tetsükdaksü ajak koktettsü atema meranga inyaksü. Ajak longjemer 'The Gospel for Everyone by 2033' mangdang ataloktsü atema ni alima nung asen adianu aser aianutem den inyaksü. Iba mangdang atangji ataloktsü atema nenok sarasadem aser teyari nüngdaksü. Asen Kümtetdakba Yisu Khrista sentsüwangshitsütsü tetemsü. Pai sayuba osangtajung yimjung, ochi temeden aser tindang ajanga dang shirangba lima atema telangzüba angutsü. Taküm melenshidaksüba osang prokba nung tetsükdaksü kecha malitsüsa asenoki inyakdi," ta pai metetdaksü.

Mansour ya 1965 küm Nazareth nung aso aser lanuwa Yirusalem aser Oxford (United Kingdom) na nung intet, tesülen pa ano Nazareth-i arua ali.

Pa high school azüingba mapang nung pai Khristan yimsü agizüka liasü. Nazareth Baptist School nung graduate asüba sülen pa Yirusalem nung aliba Hebrew University nung azüing aser 1991 küm graduate asü.

1993 küm pa Israeli Bar Association nung aden aser Haifa aser Nazareth nung law practice asü. 2009 küm pai Haifa University nung MBA renema liasü.

2004 küm nungi Mansour ya Nazareth Baptist School nung Operational Director inyaker.

1996 küm pai Nazareth nung Local Baptist Church tenteta liasü aser 2001 küm ordain süa liasü.

Pa Israel nung aliba Convention of Evangelical Churches nunga Chairman inyakogo aser Jordan nung aliba

Alliance of Evangelical Conventions nung Secretary inyak; iba dak alia pa Nazareth Village board nunga deputy chairman inyak. Pa Global Council of Advocates International nunga züngsem liasü aser Lausanne Initiative for Reconciliation in Israel-Palestine nung co-chair inyak.

Israel nung Convention of Evangelical Churches ya Holy Land nung national member bodies asem rongnung ka lir; tanga anaji Evangelical Alliance of Israel aser Council of Local Evangelical Churches in Holy Land lir.

Mansour-i Arogotem, universities aser conference aika nung tamangba yimsü aser Middle East nung tebilemtsü onüktem indang jembia aruogo.

Pai Khristan osangkakettem/magazine aika nung Arabic, Ibri aser English oshitem nung ocet zülüja aruogo. Iba dak alia pai 'When Your Neighbor is the Savior (2011)' aser 'Looking from the Precipice (2021)' kaket densema kaket aika zülüogo.

Pa kinüngtsü A'bir tena chirnur asem lir aser parnok ajak Nazareth nung alir.

WEA ya küm 180 tejaklen tenteta liasü. Alima nung Evangelical Khristantem telongjem, mission mapa aser advocacy atema WEA ya arok sabang ka lir. WEA ajanga linük balala aser region balala nung Evangelical alliances aser partner organizations longjemdaksür.

ANOGO ABEN TSÜNGREM DEN

Langka shilem ka tuluba

Ano Pai ashi, Ni ne tsürabur Tsüngrem, Abraham Tsüngrem, Isak Tsüngrem aser Yakob Tsüngrem. Aser Mosai pei tejak miim kechiaser pai Tsüngrem dak reprangtsü tsübu. Anitet 3:6.

Tsüngremi ne den ne jakdang aortem taküm nung kechi atalok iba den putepa ne den jembir. Kodang Tsüngremi Mosa den ajurutep pa dang tama aortem dangi balaka pa nem mapa magütsü. Tsüngremi Abraham, Isak aser Yakob den küm noklang tejakdang tenangzükbatem yanglu aser pai tang iba tenangzükbatem atalokdaksütsü asoshi Mosa amshir.

Tsüngrem shibai Mosa ani, shibai Elija ajanga inyak, shibai Paul anishi, shibai putu ajak nung tetsür, tebur anishi, kasa Tsüngremi na Pa mapa nung tendaksütsü ajar. Nai iba temoatsüji angateta lir ma? Na ne dang nungi tuluba nüngdak shilem ka lir!

Asenoki tang atema dang bilemer. Asenoki tanga inyaktetbaji aginer aser teti taküm tangatetbaji makar. Tsüngremi kodanga mapa inyaka maru ama asenoki inyaker. Asenoki pa dangi maodanga Pa liasü. Tsüngremi asenok ajanga inyakba mapa nungi kechi adoker aji asenokisa angutsü yimlar. Asenok alidangsa Tsüngremi iba ataloktsütsü ta asenoki yimlar. Tsüngremi asenok ajanga kechi tenzüka aji tangar ajanga atalokdaksütsü mesüra tarutsü putu nung ataloktsütsü bilembaji asenoki matatetter.

Tsüngremi küm noklang aika inyaka aruba mapa nung Pa tendaksü ta, Mosai angateta liasü. Kodang Mosa tebu nungertem Tsüngrem den tejak o tejak na ajurutep pa kanga dang ajemalua aküm. Na Tsüngremer tatem maka nükjidadong shilem ka lir ta angatetta lir ma ?

Gaza nung rara aitsüba atema Italy nunger putir ka Israel nungi meindok



Don Nandino Capovillace

August 18, 2025: Italy nunger Khristan putir kati Israel sepaitemi Gaza nung Palestine nunger jenti tepsetba aitsüba sülen pa Israel nungi meindok.

Venice nungi putir, Don Nandino Capovillace ya Pax Christi Italy temeshi ainlen jajar telok ka den külemi aru. Parnok Bethlehem, Jerusalem aser West Bank-i aoba mapang nung pa Ben-Gurion Airport nung soit, aser ghonda tenet shi pua ayuba sülen Cyprus aser Frankfurt ajanga Italy-i tanaben

meyipa yok, ta osang ka ajanga metetdaksü.

Osangbener den jembidang Capovilla-i, "Küm 70 tashi pei lima nung tepuokdak alirtem ama züngshiba nüburtem indang zülü nung ang ni ghonda tenet pua ayuba indang interview asütsü atema ni journalist dang melatsü," ta metetdaksü.

Temeshi aini aoba telok nungji lenir, Archbishop Giovanni Ricchiuti-i, "Capovilla meyipa yokba atema onok nem official kuli kecha memetetdaksü,

ajisüaka tawa Capovilla-i 'Under the Gaza Sky' kaket züluba agi pa meyipa yok asütsüa akok. Iba kaket nungji Palestine nunger tepsetba indang kulitem aika lir," ta metetdaksü.

Pasa, "Onok Rome aser Venice nungi temeshi ainlen senzüa yangi (Israel) arua lir. Iba ya onok indang ochi temeden aser yimjung campaign 'Jara masü apu yangluang' dak sendakba shilem ka lir," ta metetdaksü.

Pax Christi teloki Italy sorkar dang Israel aijang, raraba hadir export asüba anenang aser Palestine ya linük ka ama agizükang, ta akhanger.

Israel Ato kilonser Benjamin Netanyahu-i, Gaza City azüokba ajanga dang rara anentsü, ta sangdongogo, ajisüaka UN security council senden ka nung UN ambassadors aikati ibaji aitsüogo.

Iba senden nungji US-ibo Israel pusem. Ambassador Dorothy Shea-i, pua alirtem chioktsü aser rara anentsü atema Israel-i inyaker, ta ashi.

Laisa, Hamas teloki pua alirtem chiokra tanüsa rara anentsü akok, ta ashi.

AO OSHI ANGAZÜKDAK:**TANÜ ANGAZÜKTSÜBA OJANG****Tesongtet**

(n) ajungketa tua aliba tesem, ongmanj tajung (elevated place)

* Arogoi yimtak tesem tesongtet ka nung tenla ki asü.

Tesotba

(v) aremzükbä, tazüokba (restraint)

* Nisung shia taküm nung tesotba alitsü nüngdaker.

**OLONG PAITEP # 7244**

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasa tsüingda jatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7243 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA

Alima tesem balala nung kanga sapua achiba chiyongtsü Pizza ya aso 18buba mesüra 19buba nung Naples nung mezüing yanglua liasü. Aso aika sobaliba balala nung amtsük nung toppings balala inoka yanglua aruogo, saka tanü pizza asangba yimya ya Naples nung tenzüka liasü.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimym bureau tem nung agüjang.

Assam nung tetsür asem train agi tsükset

Guwahati, Luroi/August 18 (Agencies): Assam kübok Boko jila nung tetsür asem railway track nung senzua aliba mapang train agi tsükseta süogo.

Asürtem ya Uttara Das (50), Rumi Das (35), aser Karabi Mali (35) ta jangjaogo. Parnok asemprongla ya Boko kübok No. 2 Satabari yimtsüing nung alir.

Iba tesem nung alirtemi ashiba agi, National Highway 17 nung gari agi tzü jakloksüba nungi jenboa alitsü atema tetsürtem ya tawa railway track nung senzü tenzüka liasü.

Iba lendong ya Bamunigaon Railway Station anasa Gate No. 240 nung atalok. Parnok asem train lenman nung senzua aliba

mapang train ana mapang ka nung süitepba sülen par asem ya tsükset. Khu abenba NMG train ka track ajanga aliba mapang Guwahati-i oya aliba Ujanimukha Puri Express süi aser iba train yagi tetsürtem ya tsükseta liasü.

Bamunigaon Railway Station ya Frontier Railway zone nung Rangiya Railway Division küboki aiter. Iba tatalokba ajanga iba tesem nung alirtemi tekümüzükbä dak sendakba nung tebilemtsü adokogo.

"Iba tatalokba ya ta mezüingbuba masü. Küm ishika tsüingda iba tesem nung nisung 20 shi süogo. Iba amala lendong mataloktsü atema tangsa tang jenjang agitsüla," ta yimdaklir kati ashi.

Lendong atalokba sülen Boko Police aser Railway Police nati takaratiba nung telangzüba agütsü aser tasümanj ya post-mortem examination atema yoka liasü. Police ketdangsür kati ashiba agi, "onoki iba tatalokba bushisüingdangdar aser iba tesem ya lendong aketba tesem ka ta mekazüka yuogo. Iba tesem nung nüburtem kümzüka toktsütsü atema jenjang agitsü asoshi report ka agütsütsü."

Iba tesem nung alirtemi ketdangsürtemi dang atsü atsütsütsü, speed limits toktsütsü aser awareness campaign tem ayongzüka katsütsü mepeshia m e t e d a k t s ü o g o . Ketdangsürtemi iba tesem ya asadangsü imlar.

Akhil Gogoi Dibrugarh court nung nokdak

Guwahati, Luroi/August 18 (Agencies): Aluyimertem lenir aser Sivasagar nung MLA Akhil Gogoi, 2019 küm Citizenship Amendment Act (CAA) anema longkak aitiba dak sendakba nung ken o pongu atema Hombarnü Dibrugarh court matsüingdang nokdakogo.

Gogoi-i pa okadaki aoba indang osang ya pa indang social media account tem ajanga metetdakja liasü.

Gogoi ya Raijor Dal tir lir aser pai CAA aser Bharatiya Janata Party (BJP)-i aniba sorkar anema ola adoka arudar.

Pa anema benokba ken o tem ya Unlawful Activities (Prevention) Act (UAPA) aser Indian Penal Code (IPC) dak sendaka lir.

Ketdangsürtemi ashiba agi,

CAA anema longkak aitiba mapang azütokshia longkak aitiba nung Gogoi-i tongtibang shilem agia liasü.

National Investigation Agency (NIA)-i iba ken o maneni bushisüingdangdar aser ashiba agi, iba mapang longkak aitiba ya national security tashi meiti kümdaktsütsü atema tasa asar inyakba nung shilem ka liasü.

Tawa Special NIA Court kati UAPA aser IPC kübok section balala dak ajemdaker Gogoi aser tangar asem anema ken o benokogo.

Taoba mapang NIA court kati discharge order agütsür aliba magi kümdakja Gauhati High Court-i telemtetba agiba Supreme Court-ia agizükba sülen tang iba ya atalokogo.

Supreme Court-i Gogoi nem bail agütsüogo, saka iba ajanga

taitsübatem maneni tejakdangi bener aotsü temelaba agütsür.

Gogoi ya mezüing 2019 küm December ita apu. Okadaki 2021 küm June ita pa nem ken o ka nung bail agütsü, ajisüaka NIA-i iba telemtetba agiba anema nokdaka charges ya tanaben takok ngua benokogo.

Temzüing ozüing dak sendakba nung ken o aika obendang tesüdak liaka Gogoi ya Assam nung yimden yimsüsüba nung maneni yakyaka inyakdar aser pa ya MLA ka aser political organizer ka lir.

Civil rights teloktem aser political commentator temi iba ken o ya kanga junga asadanga arudar aser parnok kari ashiba agi, yimden yimsüsüba dak sendakba nung sorkar anema ola adokertem ola remseptsütsü atema sorkari item ken o tem benoka liasü.

Manipur Police CID personnel ka rakzükrakdemba atema apu

Imphal, Luroi/August 18 (Agencies): Manipur Police Criminal Investigation Department (CID) personnel ka aser tangar ka Deobarnü Imphal East district nung Andro Police Station kübok Yairipok nung nüburtem dang nungi rakzükrakdemba lia puogo.

Rakzükrakdemba mapang tenati kazütsü prangbong ka amshiba dena ngutetogo, ta ketdangsürtemi Hombarnü

metetdaksü.

Yairipok Top Laimang nung alirtemi tena ya apu. Aija alir ana ya Yairipok Tapokpi nung alir asür Khullakpam Tomcha'er jabaso Md Amumacha (40) aser Yairipok Tulihal nungi Md Firoj'er jabaso Md Asat (30) ta jangjaogo. Tenaprongla ya kasa district nungi lir.

Amumacha ya tang Manipur Police nung CID

personnel ka lir.

Ketdangsür sangdong ka ajanga ashiba agi, tena ya Yairipok Top Laimang tesem nung kazütsü prangbong ka amshia local tem dang nungi rakzükrakdemba aliba mapang tialong nung apu.

Iba sülen tena den tena ket nungi ngutetba kazütsü prangbong ya Andro Police Station nem bendanga agüja liasü.



DELHI PUBLIC SCHOOL, DIMAPUR

Dated : 18.08.2025

PRESS STATEMENT

A disturbing incident involving the physical assault of a young individual by a group of youngsters has recently gone viral on social media, sparking widespread concern. A written caption accompanying the video falsely claims that the culprits are Class XI students of Delhi Public School, Dimapur. We wish to address this matter with utmost seriousness and clarity.

- At the outset, Delhi Public School, Dimapur expresses deep concern and heartfelt wishes for the swift recovery and well-being of the young individual who was brutally assaulted. Our thoughts and prayers are with the victim and the family.
- Delhi Public School, Dimapur firmly condemns the act of violence. Violence in any form is unacceptable and we advocate for peaceful conflict resolution and stand against all forms of aggression and bullying.
- Contrary to the contents of various social media posts, none of the individuals involved in the assault are students of Delhi Public School, nor are any of them even remotely related to the school in any manner. The claim being circulated is entirely false and misleading. We deeply regret that misinformation on social media has been used to malign the school's name through deliberate and baseless accusations, which has resulted in our school being subjected to social media trial. We urge all to refrain from spreading unverified claims and to act responsibly when sharing sensitive contents.
- This incorrect reporting has cast serious aspersions on the reputation of our institution, its students, and the parent community, causing unwarranted distress and damage. We are committed to protecting the integrity of our school and therefore, all appropriate measures under the law towards this end is being pursued.
- We sincerely thank all the stakeholders, with special appreciation to the parents for standing solidly with the extended family of Delhi Public School, Dimapur during this difficult time.

As an institution, Delhi Public School, Dimapur remains deeply committed to fostering integrity, empathy, discipline and good conduct among its students, while imparting quality education rooted in truth, fairness and strong values. We will continue to uphold these principles and nurture global citizens, undeterred by any attempts to tarnish our reputation.



G Mala
Principal

Myanmar nung December 28 nü election tenzüksü

Bangkok, Luroi/August 18 (Agencies):

Myanmar indang mitkari shimba election commission ajanga election December 28, 2025 nü tenzüksü ta Hombarnü sangdongogo, anungji mapang talangka nungi yongya ataba election anogo lateter, kong army temi 2021 küm tashiyim amshia sorkar atsüngdokba ya yimya ka ama kumdahtsütsü tebilemba nung tenüng agi agir ta aikati aitsür.

Union Election Commision ajanga osangbener dangi sangdong ka yokba nung elections ya anogo ishika nung phase lemsar agitsü aser iba sentong tarensen tekeraba nung sangdongtsü ta ashi.

Commission nungi sangdong ka sorkar meyong Myanma Alinn osangkaket nung Honibarnü adokba nung, election asoshi linük nung townships 330 prong constituency ama asütsü ta ashi.

Mitkari bhukumba Union Solidarity and Development Party densema party 60 jungnüa election nung tokteptsü tenüng agüja lir, ta commission indang website nung shia lir.

Mitkari tentetba sorkar kübok masü saka democracy bhukuma nokdaker aser ethnic minority rebels tem kübok aliba tesem aika nung election ya koma agitsüar mejangja. Linük tesem tuluba nung civil war adoka lir.

Nok-nü amer nokdakba teloktem densema opposition telok aikati iba election

nokdangtsü lenmang bushitsü ta ashir.

Taoba ita mitkari tenteta aliba sorkari electoral ozüng tasen ka yanglu, kong elections anemer mesüra tetsükdahtsü agütsür nem tasüba temerenshi tashi agütsütsü renema lir.

Mitkari yimsüsüba anemer temibo mitkari sentong yangluba election ya pei mulungba nunga masütsü mesüra timia magitsü, kechiaser media ajak alena lir aser Aung San Suu Kyi'er nüngtugu National League for Democracy party lenirtem timba puogo ta mitkar anemer temi ashir.

Myanmar nung tesüsa 2020 nung general election agidang Suu Kyi'er party-i takok tulu angu, saka küm pongu kümsük tanabuba tenzüksü lia mitkar temi February 2021 nung lar sorkar nungi tashi rakzük.

Arishi küm 80 tain Suu Kyi ya mitkar temi benokba ken o aika nung aija tepuokdak küm 27 tashi alitsü obendang agütsür yua lir.

2020 general election nung ashikülak mapa tulu inyak ta tai tonglokja mitkar temi yimten tashi rakzük, saka independent election observers temi yamaji tim masüba mapa tulu inyakba mali ta ashir.

Army temi yimten tashi agiba ajanga tesem ajungalen anema nokdak aser tesem balala nung nok-nü amer nokdak aser linük tesem tuluba ka nung rongrong adok. Tang yimsü tesüdak mitkar temi par

nükjidongji election agitsüba ya lir ta ashir, saka aiben anogo thinena arur.

Myanmar nung tang security tensa ajanga election agitsü kanga tasak lir, kong mitkar temi linük tesadang ka dang tajemba ang amokbanger yimsü asür ta amanger. Taoba mapang military sorkari election ya par kübok aliba tesemtem nung phase lemsar agitsü ta shia lir.

Election agitsü lia opposition forces temi amokbanga aliba tesemtem tanaben agitsü mechi mitkar temi ali nung aser tayimtsü amshia amakba maparen tali kumogo aser tawa tayimtsü amshia amakdang civilian aika tepsetba osangtem lir.

Deobarnüa Kayah state (Karenni ta ajar) kübok Mawchi jila tilaka nung aliba mozüki ka nung mitkar temi bomb poklohtsüba nung nisung 24 asü aser aika yiru ta Myanmar independent online media osang ajanga ashir. Iba jila ya wolfram aser tungsten atuba tesem tiyong ka lir.

Ano Mogok jila nunga Brehostibarnü tayimtsü amshia amakba nung mashisa tetsür ka densema nisung 21 tesept, ta osang balala ajanga ashir. Mogok ya Myanmar nung gem-mining industry tiyongtsü lir.

Item tatalokba ya army temi tejangja mashir, shirnoki iba ama amakba ya rara nung nükjidong tejangja nung amakba lir aser resistance forces ya kiralongrartem lir ta tai tonglohtsür.

Menungra Bilemteter



ASÜR OBALA SASHIKABA JAMIR (Mangmetong)
04/02/1942 - 19/08/2020

Küm 5 (pongu) tejaklen nüktang tajung ka lao, kibong tamang jenjang nung milen pong remsep ama kümadok. Saka Tsüngrem tajungsang taochi nung tanü ajak noktaka lir. Tsürabur tajung menungrar-a ni!. Alima tejakleni kara mera odagi, saka nü jak aser mapa tajung onok mulungjang nung teti lir. Nü tsüngnep jangja janga angür aser iba tsüngsü nung onok mera agitsü meranger. Nai atongba tesangwaji onoka sarasadema atongtsü merangdi. Tsüngremer mapang nung ajuruteptsü, sarsademer.

Nai teti meima aliba,
Kinüngtsü, Chirnürtem, Anük-apang aser Semchirtem.

KONANG TETUSHI AGÜTSÜR

18th July nungi 20th July, 2025 tashi South Korea nung Open International Taekwondo Championship asaya tetoktepba nung asen Nagaland tenüng nungi **Mr. Sentimoo Ozüküm**, Mr & Mrs. Imlitemsü Ozüküm (Süngratsü) jabaso, pai under 55 kg category asayaba nung Gold Medal jenjang ngutetba asoshi Süngratsü Union Yisemyong ajanga konang tetushi agütsür. Tarutsü nung ne sempet aser ne taküm Tsüngremi maneni moajangma.

Sd/- Akangmar President Süngratsü Union Yisemyong	Sd/- Tekawapang Secretary Süngratsü Union Yisemyong
---	---

Zelenskyy-i khen nung rara tembangtettsü: Trump

Washington, Luroi/August

18 (Agencies): Russia indang rara anentsü atema tezüngzüktep ka agizüksü asoshi United Stated Tir Donald Trump-i Ukraine tali ajungshia Ukraine Tir Volodymyr Zelenskyy-i iba rara ya khen nung tembangtettsü ta ashi.

Hombarnü White House semdangtsü anogo ka lia Zelenskyy dang, Russian-occupied Crimea meyihtsütsü aser NATO nung Ukraine züngsem akumtsü indang yimjung asoshi jembishinüba nung malitsü ta Trump-i tekumdangtsü ashi.

"Ukraine Tir Zelenskyy-i aginüra Russia den rara ya khen nung tembangtettsü, mesüra pai maneni raratsü akok," ta Trump-i pa indang Truth Social sapang nung Deobarnü ashi.

"Koba tenzükär bilemtetang. Obama-i agütsüba Crimea (küm 12 jakdang injang kata makhadok) mangutsü, aser UKRAINE YA NATO DANGI MAOTSÜ. Itemji kodanga memelenshitsü!!!"

Russia Tir Vladimir Putin-i aginütsüsa US tiri tezüngzüktep ka yanglutsü akok ta Brussels aser Kyiv nung tebilemtsü akaba mapang Hombarnü Washington, DC-i Zelenskyy meina European lenirtem aotsü lia Trump-i iba o ya ashi.

Deobarnü Trump-i iba o zülur mapang tatsüka tsüngta Zelenskyy-i jembidang, Crimea densema taoba mapang Moscow nem alinük agütsüba ajanga Putin-i rara tali raratsü temulung uludaktsür, ta ashi.

"Asenok ajak dak iba rara tekeraba aser tajungtiba nung tembangtsü tejangraba lir. Aser tesunep ya teti asoshi asütsüla," ta Zelenskyy-i X nung ashi.

"Küm ishika jakdang Ukraine nem Crimea aser asen Donbas anüdoklen yutsüdaktsü, aser Putin-i itemji 'springboard' ama amshia asendenshir amakba ama masü. Mesüra Ukraine nem 1994 nung 'security guarantees' agütsüba, saka itemji mapa kuma meinyak."

"2022 sülen Ukraine nungeri Kyiv, Odesa mesüra Kharkiv magütsüba ama tesüba mapang Crimea ya magütsüla asü, ta Zelenskyy-isa ashi.

"Ukraine nungertem pei li, pei nüchiso asoshi rarar," ta pai ashi. Moscow den tezüngzüktep yangluba nung Russia aser Ukraine tsüngta alinük kar melentepba alitsü ama Trump jembishinü nungi angateter, ajisüaka "occupier" nem Ukraine litsü magütsütsü ta Zelenskyy-i shijen ashir.

Trump nem Ukraine yaridaktsütsü mechi Hombarnü White House nung jembishinüdak European Commission President Ursula von der Leyen, German Chancellor Friedrich Merz, aser France Tir Emmanuel Macron densema European lenirtem adentsü.

Russia-i tashiyim amshiba nung European lenirtem aser Zelenskyy telungjem nung nokdaktsü nükjidong lir, ta Macron-i Deobarnü ashi.

(Maneni tapak 8 nung...)

Dr. T Ao Trophy akokba atema Mon nung tenüngsang agütsüba sentong agi

Dimapur, Luroi/August 18 (TYO): Mon District Men's Football team-i Dr. Ao Trophy 24th inter-District football Championship 2025 akokba atema August 18 nü tenüngsang agütsüba sentong ka agiogo. Iba sentong ya Mon District Administration, Mon District Football Association (MDFA) aser Konyak CSOs nungeri ayongzüka Mon Local Ground nung agia liasü.

Sentong nung Mon Deputy Commissioner, Wennyei Konyak-i asayar aser team pusemertem nem tenüngsang agütsü. Pai ashiba agi iba takok ya asayartem takok dang masü team pusemertem atema-a takok lir. Paisa, district nem konang tetushi bener arutsüba atema asayartem nem tenüngsang agütsü. Maneni DC-i asayartem dang

longjemer tejakleni aotsü mepeshiba den iba ya takok asoshi tetenzüker lir ta ashi.

Sentong nung lokti pela agizükba o jembiba mapang Konyak Students' Union tir Temwang Konyak-i, taküm iba asayamung akokba ya football nung takok anguba dang masü saka iba ya otsüsütsüka lir, aser final asaya ya küm aika bilemtettsü, ta ashi. Paisa, tanü benjung ya team nem tetushi agütsüba masü saka nüburtem aser tanüla ka tushiba ka lir ta ashi. Iba takok ya tatembang masü saka lanurtem ajungmesotsü atema tetenzüker ka lir, ta pai ashi.

Kasa mapang nung SP Mon, Kanchan Kumar Kandpal, IPS-i, iba benjung nung pa-a densemba atema pelaba lemsatep. Paisa, asayar tem nem tenüngsang agütsü

aser ashiba agi, iba ya pungmang ka aser iba ya asenok den teti alitsü, ta ashi.

O tatsütsü jembiba mapang Konyak Nyupuh Sheko Khong tir aser Konyak Union tir nati asayartem nem tenüngsang agütsüba den iba tanüla mesamadaktsütsü ajungshia liasü.

Sentong ya Honjem Konyak, Asst. Professor, Wangkhao Government College, Mon lenisüba nung agi aser Pastor KBCM Rev. Moba, Pastor-i sarasadema liasü. Sentong nungsa MDFA tir Chingmei Konyak-i o tatsüka jembiba aser Hentok Konyak-i ken tajung ka dena liasü.

Maneni tenüngsang agütsüba sarasadem ka Rev. Methjen, Executive Secretary, KBBB-i ayongzüka agi aser G/ Secy. MDFA W. Kaiwang Konyak-i tepela o jembiba liasü.

Badminton World C'ships: Sen World No 1 den mezüng asayatsü



Luroi/August 18, 2025 (Agencies): Taküm World Championships nung Lakshya Sen mezüngbuba asaya world No. 1 China nung asayar Shi Yu Qi den asayatsü lir. Iba asayamung ya August 25 nü tenzüksü.

Asayar ana tang agi pongubenbuba asayatsü lir tang tashi nung Shi-i asemben aser Sen-i khen koker lir.

Taoba mapang Commonwealth Games gold medallist Lakshya, taoba küm Paris Olympics nung semifinal nung tsükba sülen junga masayateti arudar. Pa tang world rankings nung jenjang 21buba nung lir aser pai taküm tajungtiba asayabaji All England nung quarterfinal tonga asayar aliba ya asütsü.

India nungersa HS Prannoy iba asayamung nung pa dang nungi tekübokba jenjang nung aliba England nung Joakim Oldorff den asayatsü. Iba asaya kokra pa tanabuba round nung Denmark nung world No. 2 asayar Anders Antonsen den asayatsü akok.

Tetsür kija asaya nung PV Sindhu mezüngbuba round Bulgaria tsür world No. 66

Kaloyana Nalbantova den asayatsü ata lir. Ajisüaka Olympic nung medal ana tashi ngur alila ya tawa junga masayateti arudar aser lai kokyonga tura round of 16 nung China tsür No. 2 Wang Zhi Yi den asayatsü akok.

Sindhu tang jenjang 15buba nung lir aser la taküm tajungtiba asayabaji India Open nung quarterfinal tonga asayaba ya asütsü.

Tebur tarep asaya nung Satwiksairaj Rankireddy aser Chirag Shetty na mezüngbuba round atema bye nguogo. Tanabuba round nung tena India nung tarep Hariharan Amsakarunan o Ruben Kumar na mesüra Chinese Taipei nung tarep Liu Kuang Heng o Yang Po Han na den asayatsü.

Tena round-of-16 nung world No. 6 Liang Wei Keng aser Wang Chang na den asayatsü akok. Tenati Keng aser Wang na ya tiben asayaba nung anaben dang koka lir. Maneni tenati China nung tarep ya kokra Malaysia nung tarep Aaron Chia aser Soh Wooi Yik na den asayatsü, shirnoki tena 14 ben asayaba nung 11 ben koka lir.

Kohima Pickleball Open asayamung takok ngua asayaogo



Dimapur, Luroi/August 18 (TYO): Kohima pickleball Open Tournament 2025 August 16 aser 17 nü Akim Arena, Kohima nung takok ngua asayaogo. Iba asayamung atema Picko Padel-i teyari agüja liasü.

Ajak senteper iba asayamung nung team 25-i shilem agi kong tebur tarep team 18 aser tarep temeyoktep team 7 densema liasü. Iba asayamung ajanga Nagaland nung pickleball asayatsü jangraratem tali akümba aser state nungi sempet tajung aketba asayartem adokba sayuogo.

Mezüngbuba anogo tebur tarep asayar group stage aser quarterfinal asaya aser tanabuba anogo tarep temeyoktep asaya aser tebur tarep asaya semifinal aser final asaya liasü.

Tebur tarep asaya ya Vilasier Khate aser Vikhozoliev Khate nati akok aser Zhaputso Khate aser Kepeviliev Khate na tanabuba jenjang nung liasü. Vilasier aser Vikhozoliev nati final asaya ya 15-12 aser 15-6 agi koka liasü.

Tarep temeyoktep asaya final nung Imtinok Pongener aser Eyen Yanthan nati Jubal Pienyu aser Lentina Longkumer na 4-15, 15-2, aser 15-7 agi koka liasü. Eyen Yanthan ya mezüngbuba Nagaland Pickleball Open nung runner-up liasü aser tang la indang partner den külemi lai iba asayamung kokogo.

Tebur tarep asaya nung takok angur nem senpet sen 25,000 aser runners-up nem 10,000 agütsü aser tarep temeyoktep asaya akoker nem 15,000 agüja liasü. Iba den bendenloksema Abu Mehta,

shiba Nagaland Pickleball Association advisor lir, pai takoker nem senpet sen 10,000 aser runners-up nem 5000 bendenlokja asayartem tali ajungmesogo.

Iba asayamung nung ano Theja Meru, Advisor TafMa; Obed Quinker, Chairman NBHM; Kuputo Shohe, Chairman NSMDA; Prasieliev Pienyu, Chairman NHHC; Watizulu Jamir, Chairman DAN; aser Neivikuoliev Khatsü, Assistant Secretary General NOA nungeria shilem agia liasü.

Kasa mapang nung Nagaland Pickleball Association-i, Ujjwal Mukhia dang kanga pelaba lemsatepogo. Pa ya Karnataka Pickleball Association indang Vice President lir aser pa indang company, Picko Padel iba asayamung indang title sponsor liasü.

BENDANGLI OSANG : Tapak 7 nungi...

Zelenskyy-i khen nung rara..

"Tanü Russia nung jakdang asenok tashi mait sayura, tarutsü nunga raratsü asoshi lenmang lepoka yutsür," ta Macron-i ashi.

Trump-i Ukraine ya NATO nung adentsü tamakoktsü ta shiaka US special envoy Steve Witkoff-i Deobarnü ashiba agi, Hokulbarnü Alaska nung US tir den senden amendang züngsem 32 aliba alliance indang collective defence mandate mesük security guarantee ka alitsü Putin-i mulunger.

"Onoki item concession nung takok ngutet: United

States-i Article 5 ama agütsütettsü, koba mechi Ukraine ya NATO nung liner," ta Witkoff-i ashi.

Article 5 nungya NATO züngsem ka dak amakbaji alliance indang züngsem ajunga dak amak ama züngshitsü shia lir. Ajisüaka US Secretary of State Marco Rubio-i rara tembangtsü ano mapang talangka lir, ta Deobarnü shia liasü.

"Tezüngzüktep agitsüba tesemtem jangjatetba nung terenlok lir, saka mangatetep aliba tesem tulua aika lir," ta Rubio-i ashi.

BILEMDANGANG

"Nükjidadong maka alibapurtem koda tia maka."